

Tweede Kamer a aproba ayera cu

Entrante 1 di januari 2011 moneda oficial di BESS eilanden ta bira dollar Mericano envez di florin Antiano

Aki ex director di Banco Central awor ta boga pa Aruba tambe haya dollar

ORANJESTAD – Mientras cu na Aruba tin discusion si tin cu cambia e moneda di Aruba pa uno di dollar Mericano, Antia ayera a anuncia cu entrante 1 di januari 2011 lo usa e dollar Mericano como e moneda oficial di BESS eilanden, unda cu esaki lo conta pues pa islanan Saba, St Eustatius y Bonaire. Esaki despues cu ayera Tweede Kamer na Hulanda a bay di acuerdo pa esaki tuma lugar.

Mester bisa mesora si cu lo tin un tempo di gracia unda cu durante e luna di januari ainda lo por paga cu e florin antiano y tambe tin chens pa cambia e florin pa dollar. Pero despues no por paga mas cu e florin, sino e dollar Mericano so.

Den cuadro di esaki, entrante 1 di januari 2011, tur saldo bancario lo wordo converti automaticamente pa e dollar y lo uza e tasa di cambio igual cu for di 1971 ta wordo uza pa comberti florin den dollar Mericano. Cu esaki tambe a bin e informacion oficial cu entrante 10 di october 2010 BESS eilanden lo bira parti di Hulanda y lo haya e status di un curpa diferente.

Tweede Kamer tambe a bay di acuerdo cu e proposicion pa entre e periodo di 10 di october 2010 te 1 januari 2011 mantene e sistema fiscal actual normal. Ta e plan pa reemplasa e sistema fiscal entrante 1 di januari 2011, usando e tempo menciona anterior como periodo di transicion. Ta durante e periodo aki, cu lo uza e tempo aki pa trece e cambionan fiscal legal cu lo keda trata despues di e eleccion proximo di Parlamento Hulandes cu ta tuma lugar dia 9 di juni proximo.

Ta net ayera cu e matutino aki a trece e comentario di ex presidente di Banco Central Rob Henriquez unda cu e ta papia di posibilidad pa cambia nos moneda di florin di Aruba pa e dollar Mericano pasobra nos no ta suficientemente fuerte para pa

mantene esaki. No cu e florin lo devalua, sino mas bien cu e forza di compra di e florin lo cayi. A mostra cu Aruba no a sa di traha suficiente pa tin su propio moneda y como tal pa mantene su mes

financieramente rendable, ta bon pa bin cu e dolarisacion dentro di poco.

Mester bisa tambe cu mes momento presidente actual di Banco Central Jane Semeleer a

keda sorprendi recientemente ora cu el a tende di e anuncio di Antias cu a laga sa riba e idea di cambia e moneda pa esun di dollar. Algo cu a sorprende Semeleer pasobra no a tende esaki prome y

no a mira cu esaki lo tabata posibel. Pero cu e anuncio di ayera, e pensamiento aki ta ‘di sobra’ mirando cu e decision a cay caba y cu tin cu adapta esaki pa ora esaki tuma lugar na januari proximo esta 2011.